

Na osnovu člana 12. stav 1. tačke b) i l) i člana 18. stav 1. tačka b) Ustava Kantona Sarajevo ("Službene novine Kantona Sarajevo", br. 1/96, 2/96 - ispravka, 3/96 - ispravka, 16/97, 14/00 i 4/01), Skupština Kantona Sarajevo, na sjednici održanoj _____ 2004. godine, donijela je

Z A K O N

O NAUČNOISTRAŽIVAČKOJ DJELATNOSTI

I. OSNOVNE ODREDBE

Član 1.

Naučnoistraživačka djelatnost je od temeljnog značaja za sveukupni razvoj Kantona Sarajevo (u daljem tekstu: Kanton) u procesu stvaranja društva baziranog na znanju. Naučnoistraživačka djelatnost, zajedno sa visokim obrazovanjem, treba postati jedan od glavnih nosilaca ukupnog privrednog i društvenog razvoja.

Naučnoistraživačka djelatnost, u smislu ovog zakona, obuhvata naučnoistraživački i istraživačkorazvojni rad, objavljivanje i korištenje rezultata naučnih i razvojnih istraživanja, osposobljavanje kadrova za naučnoistraživački i istraživačkorazvojni rad i usavršavanje naučnika, te održavanje i razvoj naučnoistraživačke infrastrukture.

Član 2.

Ovim zakonom se utvrđuju načela i ciljevi, interesi i potrebe u naučnoistraživačkoj djelatnosti u Kantonu, osiguravanje sredstava za podršku naučnoistraživačkoj djelatnosti od interesa za Kanton, donošenje Programa naučnoistraživačke djelatnosti u Kantonu (u daljem tekstu: PNID), formiranje Savjeta za nauku Kantona, te osnovni uvjeti i kriteriji za bavljenje naučnoistraživačkom djelatnošću.

Član 3.

Interes i potrebe Kantona u naučnoistraživačkoj djelatnosti, osiguravanje sredstava i njihovo ulaganje u naučnoistraživačku djelatnost, te druga pitanja od značaja za ovu djelatnost na području Kantona uređuju se ovim zakonom.

Član 4.

Naučnoistraživačka djelatnost podrazumijeva stvaralački rad, čiji rezultat doprinosi otkrivanju novih znanja i korištenju istih i postojećih znanja za primjene u svim oblicima ljudskog djelovanja.

Naučnoistraživačka djelatnost obuhvata fundamentalna, aplikativna i razvojna istraživanja.

Rezultati naučnoistraživačke djelatnosti moraju da sadrže elemente izvornosti i novine, a vrednuju se objavljivanjem u naučnim i stručnim časopisima, zbornicima radova sa

naučnih i stručnih skupova, monografijama i sl. ili provjerom u praksi.
Navedeno vrednovanje će biti definirano odgovarajućim pravilnikom.

Član 5.

Fundamentalno istraživanje je teorijski i eksperimentalni rad poduzet ka traženju novih spoznaja i zakonitosti.

Aplikativno istraživanje je teorijski i eksperimentalni rad usmjeren ka stjecanju novih znanja, prvenstveno radi zadovoljavanja praktičkih potreba.

Razvojno istraživanje je sistematski rad zasnovan na rezultatima fundamentalnih i aplikativnih istraživanja i iskustava, usmjeren na stvaranje novih materijala, uređaja, sistema i metoda, uključujući stvaranje novih ili bitno poboljšanje postojećih proizvoda, tehnologija, uređaja, sistema, procesa i usluga.

Član 6.

Pod osposobljavanjem kadra za naučnoistraživačku djelatnost, u smislu ovog zakona, podrazumijeva se podrška i stvaranje uvjeta za stjecanje naučnog stepena magistra i doktora nauka.

Pod usavršavanjem naučnika, podrazumijeva se stjecanje novih i proširivanje stečenih znanja, putem postdoktorskih studija i drugih oblika usavršavanja.

Član 7.

Naučnoistraživačka infrastruktura obuhvata objekte, opremu i druge slične uvjete potrebne za naučnoistraživačku djelatnost (naučnoistraživačke laboratorije, postrojenja, ispitne stanice, naučne biblioteke, naučne informacijske i informatičke službe, naučno izdavaštvo i sl.).

Član 8.

Kanton, u namjeri da doprinese porastu kvaliteta života u materijalnom i kulturnom domenu, privrednom napretku i općem razvoju, osigurava uvjete za postizanje slijedećih ciljeva:

- proširivanje naučnih saznanja;
- podsticanje upotrebe nauke za društveni razvoj;
- povećanje obima i kvaliteta naučnoistraživačke djelatnosti;
- stimuliranje naučnika i istraživača;
- podsticanja saradnje subjekata iz naučnoistraživačke djelatnosti.

Član 9.

Naučnoistraživačka djelatnost se temelji na načelima:

- odgovornosti za sveukupan privredni i društveni prosperitet;
- slobode naučnoistraživačkog i istraživačkorazvojnog rada i stvaralaštva;
- javnosti naučnoistraživačkog rada, a posebno rezultata tog rada;

- konkurentnosti naučnih programa i prijedloga;
- etike i odgovornosti naučnika i istraživača za posljedice vlastitog rada;
- povezanosti sa sistemom visokog obrazovanja;
- brige za održivi razvoj, te za zaštitu čovjekove okoline;
- međunarodne uključenosti, otvorenosti i saradnje.

II. INTERESI I POTREBE KANTONA U NAUČNOISTRAŽIVAČKOJ DJELATNOSTI

Član 10.

Interesi i potrebe Kantona u naučnoistraživačkoj djelatnosti, u smislu ovog zakona, jesu:

- definiranje i realizacija strategije razvoja nauke;
- osposobljavanje kadrova za naučnoistraživački i istraživačkorazvojni rad, odnosno uvođenje u naučni rad mlađe populacije, te usavršavanje naučnika;
- razvoj postojeće i uvođenje nove naučnoistraživačke infrastrukture, kao preduvjeta za naučnoistraživački i istraživačkorazvojni rad;
- naučnoistraživački i istraživačkorazvojni projekti koji se realiziraju u saradnji subjekata iz različitih kantona, entiteta, te u okviru međunarodne saradnje;
- naučnoistraživački projekti i razvojna istraživanja čija je tematika od posebnog, odnosno šireg interesa za razvoj Kantona i države,
- stimuliranje stjecanja naučnih stepena putem međunarodne naučne saradnje.

Član 11.

Stjecanja vrhunskih naučnih stepena (doktorskih i magistarskih) u okviru međunarodne naučne saradnje i sa međunarodnim komisijama za odbranu istih predstavlja poseban interes Kantona i biće posebno definiran pravilnikom koji donosi ministar.

III. SREDSTVA ZA PODRŠKU NAUČNOISTRAŽIVAČKOJ DJELATNOSTI

Član 12.

Sredstva za podršku naučnoistraživačkim djelatnostima u smislu ovog zakona osiguravaju se u godišnjem iznosu do 2% budžeta Kantona.

Sredstva iz prethodnog stava biće utrošena u skladu s PNID-om, a 5% od izdvojenih sredstava iz stava 1. vode se kao rezervna sredstva za podršku projektima koji su od posebnog interesa za razvoj Kantona i države.

Vlada donosi posebnu odluku i kriterije za utrošak tih sredstava.

Član 13.

Sredstva iz člana 12. stav 1. ovog zakona, izuzev sredstava rezerviranih u skladu sa stavom 2. člana 12. ovog zakona, koriste se za ulaganje u osposobljavanje kadrova za

naučni i istraživački rad, te za usavršavanje naučnika, za razvoj i uvođenje nove naučnoistraživačke infrastrukture, te za poticanje naučnoistraživačkih i istraživačkorazvojnih projekata od interesa za Kanton, državu i razvoj visokog obrazovanja u skladu sa ovim zakonom.

Za namjene iz prethodnog stava sredstva se koriste putem Savjeta za nauku Kantona, koji se osniva posebnim aktom a radi pri Ministarstvu obrazovanja i nauke Kantona (u daljem tekstu: Ministarstvo).

Aktom o osnivanju Savjeta za nauku Kantona uređuju se uvjeti i način finansiranja, odnosno poticanja projekata iz stava 1. ovog člana.

IV. PROGRAM NAUČNOISTRAŽIVAČKE DJELATNOSTI KANTONA

Član 14.

Program naučnoistraživačke djelatnosti u Kantonu predstavlja osnovu za podsticanje naučnoistraživačkog i istraživačkorazvojnog rada u Kantonu.

PNID utvrđuje:

- ciljeve koji se u ovoj oblasti žele dostići na nivou Kantona;
- naučna područja i uže oblasti koje treba posebno razvijati i materijalno podržavati radi dostizanja ciljeva u razvoju Kantona i države;
- prioritete potrebe u naučnoistraživačkoj djelatnosti i prioritete ulaganja u naučnoistraživačke i istraživačkorazvojne projekte u narednom petogodišnjem periodu;
- program podrške za naučnoistraživačku infrastrukturu;
- program podrške za osposobljavanje kadra za naučnoistraživački i istraživačkorazvojni rad i za usavršavanje naučnika od interesa za Kanton;
- ostale odrednice koje su od značaja u kreiranju strategije i politike u nauci i naučnoistraživačkoj djelatnosti (period ažuriranja i redefiniciranja ciljeva koji se žele doseći u narednom petogodišnjem periodu, program razvoja sistema naučnih informacija i objavljivanja dostignuća naučnoistraživačke djelatnosti, program učešća u međunarodnim naučnoistraživačkim i istraživačkorazvojnim projektima i dr.)

Član 15.

Nacrt PNID-a priprema Savjet za nauku Kantona i dostavlja ga Ministarstvu.

PNID donosi Skupština Kantona, na prijedlog Vlade Kantona.

PNID se donosi za period od pet godina, a izmjene i dopune PNID-a se vrše po postupku predviđenom za njegovo donošenje.

V. SAVJET ZA NAUKU KANTONA

Član 16.

Savjet za nauku Kantona (u daljem tekstu: Savjet) naučno je tijelo koje osigurava donošenje i provođenje PNID-a.

Član 17.

Savjet:

- ocjenjuje stanje u naučnoistraživačkoj i istraživačkorazvojnoj djelatnosti, njen položaj i razvoj sa stanovišta međunarodne konkurentnosti, kvaliteta i društvene svrsishodnosti;
- priprema nacrt PNID-a;
- razmatra prijedloge zakona i drugih propisa iz oblasti naučnoistraživačke djelatnosti koji su u funkciji osiguravanja općih uvjeta za podsticanje naučnoistraživačkog i istraživačkorazvojnog rada i upotrebe njegovih rezultata;
- daje prijedloge za uređivanje pojedinih pitanja u naučnoistraživačkoj djelatnosti, te predlaže i podstiče donošenje mjera za unapređenje te djelatnosti;
- poduzima sve aktivnosti vezane za realizaciju PNID-a (definiranje i raspisivanje konkursa, ocjene konkursnih prijava, prijedlog alokacije sredstava po oblastima i projektima i sl.);
- donosi poslovnik o svom radu;
- podnosi godišnje izvještaje o svom radu Vladi Kantona, putem Ministarstva.

Član 18.

Savjet ima ukupno devet članova, od kojih je šest iz naučnih područja kako slijedi:

- prirodne nauke;
- tehničke nauke;
- biomedicinske nauke;
- biotehničke nauke;
- društvene nauke;
- humanističke nauke.

Sedmi član je ministar obrazovanja i nauke Kantona (u daljem tekstu: ministar) po funkciji, osmi član je ministar privrede Kantona po funkciji, a deveti član je istaknuti privrednik imenovan od strane Ministarstva privrede Kantona.

Jedan od članova iz naučnih oblasti obavlja dužnost predsjednika, a jedan dužnost potpredsjednika Savjeta.

Član 19.

Članove Savjeta imenuje Vlada Kantona iz reda vrhunskih naučnika, tehnologa i privrednika, na osnovu prijedloga ministra.

Uz prijedlog za izbor članova Savjeta, predlagač je dužan za kandidate priložiti naučno-stručnu biografiju i informaciju o objavljenim radovima.

Prilikom imenovanja članova Savjeta, pored odgovarajuće zastupljenosti naučnih područja, Vlada Kantona vodi računa i o naučnim odlikama kandidata i njihovom međunarodnom ugledu.

Za predsjednika Savjeta, Vlada Kantona imenuje posebno istaknutog naučnika, sa iskustvom iz multidisciplinarnih istraživanja i sa međunarodnim referencama i iskustvom u rukovođenju institucijama naučnoistraživačke djelatnosti.

Član 20.

Članovi Savjeta biraju se na period od četiri godine, sa mogućnošću jednog ponovnog izbora.

Član 21.

Prilikom izbora članova Savjeta potrebno je voditi računa o obezbjeđivanju kontinuiteta provođenja PNID-a.

Član Savjeta može biti razriješen dužnosti i prije isteka vremena na koje je imenovan, i to:

- na vlastiti zahtjev;
- ako ne ispunjava dužnosti člana Savjeta;
- ako svojim ponašanjem povrijedi ugled Savjeta;
- ako izgubi sposobnost za obavljanje dužnosti.

Zahtjev za utvrđivanje postojanja okolnosti za razrješenje dužnosti člana Savjeta, u smislu prethodnog stava, može podnijeti predsjednik, potpredsjednik ili dva člana Savjeta.

Ako zahtjev podrži većina članova Savjeta, zahtjev se, sa odgovarajućim obrazloženjem, putem Ministarstva, dostavlja Vladi Kantona.

Član 22.

Savjet može za potrebe svog rada i realizacije zadataka, prema potrebi, angažirati ekspertni tim ili eksperte pojedince, radi stručne ocjene u pripremi pojedinih rješenja.

Član 23.

Sve stručne i administrativne poslove za potrebe Savjeta obavlja Sektor za nauku Ministarstva.

VI. NOSIOCI NAUČNOISTRAŽIVAČKE DJELATNOSTI

Član 24.

Naučnoistraživačku djelatnost obavljaju pravna i fizička lica koja ispunjavaju uvjete propisane zakonom, kao što su:

- Akademija nauka i umjetnosti BiH;
- univerziteti;
- fakulteti;
- naučnoistraživački instituti;
- druga pravna lica koja su registrirana za obavljanje naučnoistraživačke djelatnosti.

Član 25.

Naučnoistraživačku djelatnost može obavljati i fizičko lice ako ima naučno zvanje i ispunjava druge uvjete utvrđene zakonom.

Član 26.

Pravna lica za obavljanje naučnoistraživačke djelatnosti iz člana 24. ovog zakona mogu osnivati domaća i inostrana pravna i fizička lica, u svim oblicima svojine. Ako pravno lice osnivaju dva ili više osnivača, njihovi međusobni odnosi, prava, obaveze i odgovornosti uređuju se ugovorom, koji se zaključuje u pismenoj formi.

Član 27.

Pravno lice može početi sa obavljanjem naučnoistraživačke djelatnosti ako ima najmanje 20% zaposlenih sa naučnim stepenom doktora nauka i najmanje 20% zaposlenih sa naučnim stepenom magistra nauka iz odgovarajućih naučnih oblasti. Za direktora pravnog lica iz prethodnog stava može biti imenovano lice koje ima naučni stepen doktora nauka.

Član 28.

Savjet, odnosno drugo odgovarajuće stručno tijelo pravnog lica koje obavlja naučnoistraživačku djelatnost sastavljeno je od najmanje pet članova, od kojih najmanje 40% ima naučni stepen doktora nauka i najmanje 40% naučni stepen magistra nauka. U pravilu, navedeno tijelo čine članovi sa naučnim stepenom doktora nauka.

Član 29.

Ministarstvo vodi evidenciju pravnih i fizičkih lica koja obavljaju naučnoistraživačku djelatnost. Kriteriji upisa i brisanja iz evidencije, kao i oblik i sadržaj evidencije iz stava 1. ovog člana, utvrdiće se bližim propisom koji donosi ministar.

Član 30.

Ostala pitanja i uvjeti za osnivanje i početak rada pravnih lica koja obavljaju naučnoistraživačku djelatnost, kao i pitanja koja se odnose na upravljanje i rukovođenje radom pravnog lica, djelokrug rada Savjeta, odnosno drugog odgovarajućeg stručnog tijela, upis pravnog lica u odgovarajući registar, te prestanak rada pravnog lica, uređuju se Zakonom o ustanovama.

VII. NAUČNICI I ISTRAŽIVAČI

Član 31.

Naučnoistraživački odnosno istraživačkorazvojni rad obavljaju naučnici, izabrani u naučno-nastavna zvanja na univerzitetima (redovni profesori, vanredni profesori, docenti), članovi ANUBiH i drugi naučnici izabrani u naučna zvanja; istraživači izabrani

u istraživačka zvanja, saradnici izabrani na univerzitetima u zvanje višeg asistenta i asistenta i drugi istraživači izabrani u istraživačka zvanja.

Član 32.

Uslovi izbora u naučno-nastavna i saradnička zvanja na univerzitetu i angažovanja na univerzitetu definirani su važećim Zakonom o visokom obrazovanju.

Član 33.

Izbor u naučna i istraživačka zvanja kandidata koji nisu izabrani u smislu člana 32. ovog zakona vrši komisija koju imenuje Ministarstvo.

Član 34.

Komisiju iz člana 33. ovog zakona čine najmanje tri člana, od kojih su najmanje dvije trećine univerzitetski nastavnici ili članovi Akademije nauka i umjetnosti Bosne i Hercegovine, iz relevantne naučne oblasti.

Član 35.

Naučna zvanja u smislu člana 33. ovog zakona su:

- naučni saradnik;
- viši naučni saradnik;
- naučni savjetnik.

Istraživačka zvanja u smislu člana 33. ovog zakona su:

- stručni saradnik;
- viši stručni saradnik;
- stručni savjetnik.

Član 36.

Uslovi izbora u naučna i istraživačka zvanja iz člana 35. ovog zakona su slijedeći:

- Za stručnog saradnika može biti izabran kandidat koji je završio odgovarajuću VSS, dodiplomski studij, sa prosječnom ocjenom općeg uspjeha utvrđenom aktom pravnog lica koje ga angažuje.

Izbor u zvanje stručnog saradnika vrši se na vremenski period utvrđen aktom pravnog lica koje ga upošljava.

- Za višeg stručnog saradnika može biti izabrano lice koje ima naučni stepen magistra nauka ili na Univerzitetu u Sarajevu prihvaćenu temu doktorske disertacije.

Izbor u zvanje višeg stručnog saradnika vrši se na period od četiri godine.

Po isteku ovog perioda kandidat može biti ponovo biran u isto zvanje.

- Za stručnog savjetnika može biti izabrano lice koje ima najmanje dva izborna perioda predviđena u zvanju višeg stručnog saradnika i najmanje četiri vrijednosna poena sakupljena po bilo kojoj od slijedećih mogućnosti (ili njihovih kombinacija):

- objavljena knjiga ili monografija iz odgovarajuće stručne ili naučne oblasti 1 poen,
- uspješno realiziran jedan naučnoistraživački ili istraživačkorazvojni projekat strogo usklađen sa strategijom naučnog i tehnološkog razvoja Kantona i/ili BiH 2 poena.

Po isteku ovoga perioda kandidat pod istim uslovima može biti ponovno biran u isto zvanje.

- Za naučnog saradnika može biti izabrano lice koje ima naučni stepen doktora nauka i najmanje jedan rad publikovan u časopisu ili zborniku koji prati relevantna međunarodna baza podataka (npr. Current Contents, SCI . . .).

Izbor u zvanje naučnog saradnika vrši se na period od pet godina. Po isteku ovog perioda, isto lice može biti ponovno birano u isto zvanje ukoliko u proteklom periodu ima najmanje jedan rad publikovan u časopisu ili zborniku koji prati relevantna međunarodna baza podataka (npr. Current Contents, SCI...).

- Za višeg naučnog saradnika može biti izabrano lice koje ima naučni stepen doktora nauka, najmanje tri godine provedene u zvanju naučnog saradnika, najmanje tri rada publikovana u časopisima ili zbornicima koje prati relevantna međunarodna baza podataka (npr. Current Contents, SCI...) i:

- objavljenu naučnu knjigu ili monografiju iz relevantne naučne oblasti, ili
- mentorstvo jednog kandidata koji je odbranio svoj doktorski rad iz relevantne naučne oblasti, ili
- uspješno realiziran bar jedan naučnoistraživački ili istraživačkorazvojni projekat strogo usklađen sa strategijom naučnog i tehnološkog razvoja Kantona i/ili Bosne i Hercegovine.

Izbor u zvanje višeg naučnog saradnika vrši se na period od pet godina. Po isteku ovog perioda, isto lice može biti ponovno birano u isto zvanje ukoliko u proteklom periodu ima najmanje jedan rad publikovan u časopisu ili zborniku koji prati relevantna međunarodna baza podataka (npr. Current Contents, SCI...).

- Za naučnog savjetnika može biti izabrano lice koje ima naučni stepen doktora nauka, najmanje tri godine provedene u zvanju višeg naučnog saradnika, najmanje pet radova publikovanih u časopisima ili zbornicima koje prati relevantna međunarodna baza podataka (npr. Current Contents, SCI...) i najmanje četiri vrijednosna poena, skupljena po bilo kojoj od slijedećih mogućnosti, ili po njihovim kombinacijama: • objavljena naučna knjiga ili monografija iz relevantne naučne oblasti 1 poen

- mentorstvo jednog kandidata koji je odbranio svoj doktorski rad iz relevantne oblasti 1 poen
- uspješno realiziran jedan naučnoistraživački ili istraživačkorazvojni projekt, strogo usklađen sa strategijom naučnog i tehnološkog razvoja Kantona i/ili Bosne i Hercegovine 2 poena.

Naučni savjetnik se bira na period od pet godina.

Po isteku najmanje tri godine od ovog perioda isti kandidat može biti ponovno biran u isto zvanje ukoliko je u proteklom periodu publikovao bar jedan rad u časopisu ili zborniku koji prati relevantna međunarodna baza podataka (npr. Current Contents, SCI...) ili je skupio bar jedan vrijednosni poen iz ovog člana. Odlaskom u penziju, kandidat koji je do tada imao zvanje naučnog savjetnika zadržava to zvanje.

Izuzetak od prethodnih odredbi iz ovog člana čine oblasti: historije, jezika i književnosti u Bosni i Hercegovini, za koje se kao relevantni prihvataju naučni radovi objavljeni u časopisima sa međunarodnom recenzijom za sve naučne i istraživačke stepene.

Član 37.

U zavisnosti od profila svoje djelatnosti, naučnoistraživačka organizacija kao poslodavac, za izbor u naučnoistraživačka zvanja, osim uvjeta definiranih u članu 36. ovog zakona, može propisati i dodatne kriterije.

Dodatne kriterije iz stava 1. ovog člana definiira Savjet za nauku te naučnoistraživačke organizacije.

Član 38.

U vremenske periode ne uračunava se vrijeme provedeno na porodijskom odsustvu, niti vrijeme provedeno na izvršavanju javne funkcije u periodu jednog mandata.

Član 39.

Licima koja su na univerzitetu, po posebnom zakonu, izabrana u nastavno zvanje redovnog ili vanrednog profesora, kao i docenta, nastavna zvanja se priznaju i za rad u naučnoistraživačkom pravnom licu.

U smislu prethodnog stava, nastavno zvanje redovnog profesora priznaje se kao naučno zvanje naučni savjetnik, vanrednog profesora kao naučno zvanje viši naučni saradnik, a docenta kao naučno zvanje naučni saradnik.

Član 40.

Naučnici i istraživači zaključuju ugovor o angažmanu sa pravnim licem koje obavlja naučnoistraživačku djelatnost, u skladu sa Zakonom o radu.

Član 41.

Daljnji angažman naučnika, odnosno istraživača koji ne bude izabran u isto ili više naučno, odnosno istraživačko zvanje, određen je pravilima, odnosno statutom pravnog lica kod kojeg je zaposlen.

Član 42.

Izbor u naučno zvanje vrši se na osnovu konkursa objavljenog u javnim glasilima. Konkurs iz stava 1. ovog člana može raspisati zainteresirano pravno lice uz saglasnost Ministarstva ili samo Ministarstvo, na osnovu zahtjeva pojedinaca zainteresiranih za stjecanje naučnog zvanja.

Član 43.

Izveštaj o prihvatanju ili neprihvatanju izbora kandidata u odgovarajuće naučno zvanje komisija iz člana 33. ovog zakona dostavlja Senatu Univerziteta u Sarajevu na potvrđivanje i o tome informira Ministarstvo.

Član 44.

Senat Univerziteta u Sarajevu je dužan najkasnije u roku od 60 dana od dana prijema izvještaja komisije dostaviti svoju saglasnost za izbor u naučno zvanje ili dostaviti obrazloženu odluku o odbijanju davanja saglasnosti. Ako univerzitet ne postupi u skladu sa prethodnim stavom ili u naznačenom roku ne zatraži dodatne podatke, Ministarstvo može potvrditi izbor.

Član 45.

Postupak izbora se smatra okončanim kada ga potvrdi nadležni organ, u smislu člana 44. ovog zakona.

Član 46.

Izbor u istraživačka zvanja vrši naučno vijeće, odnosno drugo odgovarajuće stručno tijelo pravnog lica koje obavlja naučnoistraživačku djelatnost, u skladu sa ovim zakonom i svojim pravilima, odnosno statutom.

Član 47.

Ministarstvo vodi evidenciju naučnika i istraživača sa područja Kantona. Osim evidencije naučnika i istraživača iz stava 1. ovog člana, vodi se i evidencija lica izabranih u naučno-nastavna i saradnička zvanja, koji sudjeluju u naučnoistraživačkim i istraživačkorazvojnim projektima. Sadržaj, oblik i način vođenja evidencije, te postupak upisa i brisanja iz evidencije utvrdit će se bližim propisom koji donosi ministar.

Član 48.

Ostala pitanja koja se odnose na postupak izbora u naučna i istraživačka zvanja utvrdit će se bližim propisom koji donosi ministar.

Član 49.

Provedba odredaba ovog zakona podrazumijeva striktno poštivanje odredaba Zakona o ravnopravnosti spolova Bosne i Hercegovine.

VIII. NAGRADE ZA NAUČNA DOSTIGNUĆA

Član 50.

Kanton dodjeljuje nagrade za vrhunska, odnosno za posebno značajna dostignuća u naučnoistraživačkoj djelatnosti, kao i za životno djelo. Kriteriji i postupak dodjele nagrada, kao i broj nagrada, utvrđuju se bližim propisom koji donosi ministar.

IX. NADZOR

Član 51.

Nadzor nad primjenom odredbi ovog zakona i propisa donesenih na osnovu njegovih odredbi vrši Ministarstvo.

Član 52.

Pri vršenju nadzora, u smislu člana 51. ovog zakona, nadležni organ može poništiti odluke organa ili drugih tijela kojima su pojedina pitanja riješena u suprotnosti sa odredbama ovog zakona.

X. PRIJELAZNE I ZAVRŠNE ODREDBE

Član 53.

Ministar će u roku od 30 dana od dana stupanja na snagu ovog zakona predložiti Vladi Kantona sastav Savjeta, te njegovog predsjednika i potpredsjednika. Vlada Kantona će imenovati članove prvog Savjeta u roku od 60 dana od dana primljenog prijedloga za imenovanje.

Član 54.

Savjet će pripremiti nacrt PNID-a najkasnije u roku od deset mjeseci od dana imenovanja članova Savjeta.

Vlada Kantona će utvrditi prijedlog prvog PNID-a i uputiti ga na usvajanje Skupštini Kantona u roku od 30 dana nakon dostavljanja njegovog nacrta od strane Savjeta.

Član 55.

Ministar će donijeti pravilnike iz čl. 4, 11, 13, 29, 47, 48. i 50. ovog zakona najkasnije u roku od šest mjeseci od dana stupanja na snagu ovog zakona, a to su:

- Pravilnik o vrednovanju naučnih i stručnih časopisa (član 4);
- Pravilnik o stjecanju vrhunskih naučnih stepena po osnovu međunarodne naučne saradnje (član 11);
- Akt o osnivanju Savjeta za nauku Kantona (član 13);
- Pravilnik o upisu i brisanju iz evidencije pravnih i fizičkih lica u naučnoistraživačkoj djelatnosti (član 29);
- Pravilnik o upisu i brisanju iz evidencije naučnika i istraživača sa područja Kantona (član 47);
- Pravilnik o postupku izbora u naučna i istraživačka zvanja (ukoliko se ukaže potreba), (član 48);
- Pravilnik o postupku i kriterijima za dodjelu nagrada iz naučnoistraživačke djelatnosti (član 50).

Član 56.

Naučnici i istraživači, po isteku vremena na koje su izabrani, mogu zadržati stečena naučna odnosno istraživačka zvanja najduže još jedan mandatni period definiran ovim zakonom.

Nakon perioda iz prethodnog stava, izbor u isto ili novo zvanje vrši se u skladu sa odredbama ovog zakona.

Član 57.

Ovaj zakon stupa na snagu osmog dana od dana objavljivanja u “Službenim novinama Kantona Sarajevo”.

Broj: _____
Sarajevo, _____

PREDSJEDAVAJUĆA SKUPŠTINE KANTONA SARAJEVO, Meliha Alić